



Famia y amistadnan a traha un “Libre Amicore” pa Digna Lacle Herrera



DEN FIN di siman famia y amistadnan a bin hunto na Alhambra, unda cu a celebra 90 aña di Digna Lacle Herrera y a sorprende cu un “Libre Amicore” cual a wordo skirbi dor di familiar y amistadnan di hopi aña. Den e “Libre Amicore” aki por lesa algo di e trayectoria largo di sra. Digna Lacle Herrera, como maestra, un persona dedica na arte y cultura, tambe ta conoci como un persona hopi spiritual y dedica na religion. E ta hopi conoci pa su talento riba tereno di literatura y poesia. E ta un persona cu semper ta contribui cu su poemanan na momentonan festivo, celebracionnan nacional.

Digna Lacle Herrera tabata wordo considera e mama di varios politico di partido AVP na cual e ta afilia y a representa e partido aki den Parlamento. E ta conoci como un persona cu un personalidad fuerte y no tin miedo pa duna su opinion, pa cual el a ocupa e funcion di lider di fraccion di AVP den Parlamento.

Den e buki cu yama “Nos Amiga” a participa coleganan di dje di tempo cu e tabata practica den enseñansa, of muchanan cu el a yega di duna les, amigonan di literatura y poema, ex politiconan, famianan hopi cerca, etc. Ta masha hopi hende a skirbi algo pa sra. Digna y tur tabata comparti e opinion: Un bunita persona, cu un personalidad fuerte y cu semper ta cla pa duna su opinion y un amor grandi pa poesia.

Durante e celebracion na Alhambra, tabata presente personalidadnan di diferente ramo manera Ramon Todd Dandare, personanan cu a traha riba e “Libre Amicore”, y tambe Prome Minister Mike Eman y su esposa Doina.

Digna Lacle Herrera semper tabatin un amor grandi pa ex Prome Minister Henny Eman como actual Prome Minister Mike Eman. E ta manera un mama y cu no tabata duda pa duna su consehonan riba tereno politico. E tabata un atardi yena di emocion y ambiente y por a mira cu sr. Digna Lacle Herrera tabata hopi feliz cu e celebracion aki organisa dor di su famia.